

大

觀

錄

大觀錄明賢詩翰姓氏卷十下目錄

劉基 陶士安 汪廣洋 孫炎 宋濂 王禕

章溢 夏煜 胡深 袁凱 高啓 楊基 張

羽 徐賁 蘇伯衡 張丁 危素 張以寧

宋訥 劉三吾 吳沈 滕毅 楊訓文 詹同

魏觀 周湏 劉崧 朱善 劉承直 張簡

宋璣 劉薦 王紳 宋克 錢惟善 方行

呂敏 劉儼 宋立禧 王逢 戴良 黃肅

牛諒 朱夢炎 張翼 魯淵 錢宰 陳汝

言 金綱 錢用壬 陳基 丘民 全思誠

余詮 李質 吳雲 蘭以權 吳伯宗 鮑恂

李克正 林公慶 桂德稱 吳琳 胡翰

王彝 貝瓊 徐尊生 陶凱 曾魯 高巽志

孫作 梁寅 汪克寬 韓奕 王賓 王履

王行 陶宗儀 邵亨貞 管訥 貝翱 朱

同 趙訪 朱右 周子諒 張昱 吳志淳

高明 滕克恭 藍仁 王沂 王佑 葉顥

董紀 馬琬 周矩 練高 沈貞 楊彝 戈

鎬 范準 謝徽 梅頤 劉紹 王嘏 陳鈞

陶琛 董遠 陸仁 陸居仁 余堯臣 舒

頤 貢悅 陳輔 劉炳 郭奎 熊鼎 劉駟

許伯旅 張宣 俞貞木 涂幾 金慎 薛

敬 周致堯 劉渙 凌雲翰 胡奎 殷奎

虞堪 朱昇 吳舜舉 鄭真 劉仔肩 王

翰 顧祿 童冀 烏斯道 唐肅 謝肅 藍

智 林弼 沈夢齡 劉永之 張紳 涂穎

揭軌 周啓 任原 葉子奇 吳植 許繼

陶誼 元宣 危進 朱芾 周砥 馬治 盧

熊 袁華 秦約 馬麟 呂誠 詹希源 偶

桓 郊韶 趙俶 易恆 申屠衡 錢達 張

適 周南老 徐達左 張展 許觀 卞同

袁養福 顧文煜 張著 陶振 陳璧 張簪

瞿莊 蕭規 包聖 朱希晦 林鴻 浦源

桂衡 金信 朱應辰 邾經 梁蘭 鄭挺

謝林 蕭岐 鄭桓 林右 陳謨 孫蕢

李德 黃哲 王佐 趙介 方克勤 葉居昇

張樞 莫士安 李睦 郭珏 冷謙 方孝

孺 茅大方 練子寧 黃子澄 黃觀 王叔

英 程本立 唐之漳 龔詡 嚴震直 漏瑜

大觀錄目錄

二怡寄軒

魏澤 林溫 葉見泰 李綱 宋廣 姚道

衍 解縉 王璉 王璉 瞿佑 王紱 楊士

奇 楊榮 楊溥 胡廣 金幼孜 夏原吉

黃淮 胡儼 沈度 沈粲 沈藻 梁潛 梁

時 黃守 王達 曾繁 王英 王直 周忱

李懋 陳敬宗 李昌祺 周述 章敞 周

孟簡 尹鳳岐 黃立 何澄 張洪 曾烜

陳璉 虞謙 趙扛 陳亢宗 陳繼 熊直

王僈 程南雲 高棟 金問 林環 袁珙

袁忠徹 錢習禮 熊概 苗衷 馬鐸 陳鎰

郭武 沐昂 陳循 高穀 金誠 晏鐸

魏驥 于謙 薛瑄 劉球 徐有貞 劉珏

張復陽 劉定之 劉儼 倪謙 祝顥 韓雍

項忠	商輅	卞榮	岳正	夏寅	倪敬
聶大年	周鼎	杜瓊	張宵	沈愚	沈恆
柯潛	楊守陳	王越	童軒	湯允勤	彭華
丘濬	李應禎	彭韶	李東陽	謝鐸	張
泰	劉大夏	倪輔	倪岳	姚綬	馬愈
越	程敏政	韓文	張弼	陳獻章	林瀚
文洪	吳寬	楊一清	文林	謝遷	王鏊
梁儲	趙寬	邵寶	喬宇	儲巘	楊循吉
費宏	石琚	陸完	羅玘	文森	朱存理
沈周	史鑑	黃雲	金琮	魏儒	錢福
澄	李夢陽	王守仁	都穆	周用	陸深
徐禎卿	姜立綱	祝允明	唐寅	張靈	文
徵明	蔡羽	陳淳	王寵	夏言	唐順之

大觀錄明賢詩翰姓氏卷十下

劉誠意基

公名基字伯溫青田人元明經進士石抹宜孫總制處州公爲院經歷宜孫敗歸伏青田山不肯出孫炎奉命鉤致乃詣金陵以佐命功封誠意伯官至御史中丞武宗朝謚文成著覆瓿犁眉公諸集按明人翰牘孫北海先生最所寶重謂較之元人聲價高傳世少耳誠意札余在少宰處獲覩惟三札內與通直二札體似顏平原一札頗瘦勁俱正書不作行草片牘之貴直與松雪相頡頏也

陶學士安

公名安字主敬太平人明祖渡江首率父老奉迎數陳大業力贊攻取留置幕府開國後置翰林院卽命

爲學士御製國朝謀略無雙士翰苑文章第一家門
帖賜之洪武初擢江西行省參政卒有學士集公書
出入柳誠懸閒有縱放却步趨古法轉覺神妙且傳
世稀少聲價高貴不僅作明札觀矣

汪忠勤廣洋

公名廣洋字朝宗高郵人工詩游寓太平事明祖於
帥府出參軍事升行省參政入爲中書左丞封忠勤
伯拜右丞相貶廣東行至太平詔追斬之著鳳池吟
藁公善篆隸行草得晉宋人風致

孫丹陽炎

公名炎字伯融句容人明祖下金陵辟行省掾以省
都事總制處州苗將叛被擒罵賊死追封丹陽縣男
公長身鐵面一足偏跛長於歌詩下筆快掃百紙可

盡著左思集書札學懷素有別致楮墨精妙

宋學士 濂

公名濂字景濂浦江人少游於吳萊之門又從柳貫黃潛學遂以文名海內元末辭辟召入仙華山爲道士號立真子明祖徵至建康命爲元史總裁官仕終翰林學士居開國文臣之首武宗朝謚文憲公毫翰得化度寺碑之神行草特工妙正楷尤精流麗雄暢於松雪翁可以繩武

王待制 禕

公名禕字子充義烏人齒幼於景濂同出黃柳之門元末隱青巖山明祖徵爲中書省掾進平江西頌上喜詔修元史書成拜翰林待制奉使雲南抗節死英宗朝謚忠文著大事記華川集公楷書得柳誠懸風

度轉以瘦勁取勝余曾見長卷翰墨好事家珍爲秘
玩然亦絕無而僅有不可必得也

章中丞 溢

公名溢字三益龍泉人結廬邑之匡山有看松菴苦
齋宋濂劉基爲之記嘗受元辟屢平蘄黃等盜積功
不受官明祖有天下應聘而起歷官御史中丞母喪
死孝公書牘帶章草有神采飛舞飄飄欲仙之趣

夏博士 煜

公名煜字允中金陵人明祖下建康辟授行省博士
調浙東分省鄱陽之戰公與劉誠意在帝左右命草
檄賦詩揚旗伐鼓橫桴中流軍威震盪友諒走死洪
武初卒書法與歐陽圭齋相若端莊可重

胡縉雲 深

公名深字孟淵龍泉人元末爲石抹宜孫參謀內附
後擢中書左司員外除王府參軍總制處州等翼征
陳有定馬蹶被執死之追封縉雲伯書牘以瘦峭取
勝滿紙風韻奕奕也

袁御史 凱

公名凱字景文華亭人少以白燕詩得名洪武閒上
慮囚畢命東宮覆訊多所未減時公爲御史上問孰
是奏對持兩端上不懌公惶懼託顛疾辭歸歸田後
每背帶方巾倒騎烏犍往來峯泖間好事者圖以入
畫著海叟集四卷公書棱棱剛勁時帶坡公體勢余
見大書三札甚可愛

高太史 啓

公名啓字季迪長洲人至正間淮張開藩公避地吳

淞之青丘自號青丘子洪武初召入纂修元史授編修三年擢戶部侍郎力辭放還七年坐魏觀修府治作上梁文腰斬年三十九公身長七尺具文武才略書無不讀尤邃於史著缶鳴集十二卷公書初習樂毅論後自成家法小字尤婉媚饒風致貴品也

楊按察基

公名基字孟載蜀人居吳明師下姑蘇以公會客饒介所徙濠洪武初起知滎陽縣謫居久之薦爲江西行省幕官尋落職六年又起奉使楚粵授兵部員外進山西按察使被讒奪職供役卒於工所公與高啓張羽徐賁爲詩友人稱吳中四傑著眉菴集十二卷書帶行體稍瘦弱但有風度傳世甚多價未鼎貴

張太常羽

公名羽字來儀以字行更字附鳳尋陽人居吳喜吳興山水與徐賁約卜居戴山洪武初召對稱旨擢太常司丞掌文淵閣事命撰滁陽王廟碑當時以大制作推任十八年坐事竄嶺表未半道召還抵京知不免投龍江死歸葬九里岡著靜居集六卷書體端方蒼兀有古氣傳世亦多

徐布政 賁

公名賁字幼文蜀人徙吳北郭十才子之一也工詩善畫淮張開藩與張羽避地吳興居蜀山洪武中用薦起家廉訪晉冀歸驗行橐惟詩數首授給事中改御史累升河南左布政坐所司軍興乏犒下獄死著北郭集公翰牘多正書然結體殊拘謹而行筆復率意未能高古

蘇編修伯衡

公名伯衡字平仲金華人文定公長子婺州守遲後
明初官國子學正擢翰林院編修宋濂致仕薦公自
代召見固辭賜文綺還山後起教授處州以表箋忤
旨逮繫卒著平仲集書作蠅楷體圓熟閒帶行法

張副使丁

公名丁字孟兼以字行金華人明祖嘗問鑑基當今
文人誰第一對曰宋濂其次臣不敢多讓又其次則
張孟兼也出爲山西按察司副使布政使吳印鍾山
僧也上怒其與己抗逮赴京捶之至死方正學爲作
傳公書與俞紫芝相似絕有風致然聲價高於紫芝
亦甚難希有者耳

危學士素

公名素字太樸金谿人仕元爲翰林承旨元亡召至金陵洪武二年授翰林學士明祖初甚禮重一日聞履聲橐橐詢爲誰曰老臣危素上不懌曰道是文天祥來遂謫佃和州書工楷法在松雪翁上行草亦妙

張學士以寧

公名以寧字志道家閩之古田號翠屏山人元時官祭酒明初例徙金陵復爲翰林學士三使安南卒年七十六貫穿經史作春秋胡傳辨疑門人淮南石光霽輯其翠屏前後集書法蕭黃門謂是得力於化度寺碑而結體圓轉肉中帶筋明初書家之卓卓者惜傳世不可多得耳

宋祭酒 訥

公名訥字仲敏滑縣人元末進士明初徵爲國子助

教升文淵閣大學士遷祭酒卒謚文恪著西隱稿書法端嚴體勢豐肥余見凡七札字大徑寸致佳爲明札之貴重者

錙學士三吾

公名三吾字如孫一字坦甫茶陵人洪武十八年用薦除左贊善撰洪範注後序稱旨升學士公富於學殖典司文章當宿老凋謝之日朝廷大制作多出其手然屢忤上意以耄獲宥著坦齋集公書初學聖教序後變化古迹自成一家風骨棱棱勁健可愛惜流傳絕少不免星鳳之歎耳

吳閣學 沈

公名沈字濬仲蘭谿人明初召爲翰林待制尋升東閣大學士以文學被寵後以懿文太子故被讒死詔

獄朝野憐之書體徑寸大端方沈着具有法度但傳世甚多耳

滕尚書 毅

公名毅字仲弘鎮江人以儒士徵給事大帥徐公達幕下授起居注洪武初設六部首擢爲吏部尚書書法絕類宋金華然金華結體頗小公則舒縱有大逾徑寸者矣

楊尚書 訓文

公名訓文字克明潼川人吳元年徵爲起居注歷官至戶部尚書河南參政卒書法與宋王份同一結構

詹承旨 同

公名同字同文婺源人初名書明初歸附後賜今名授國子博士歷官吏部尚書致仕復起爲承旨卒著

大觀錄 卷十

六一帖 寄車

舒嘯集書法絕類蔡京然結體頗大行筆亦縱橫跌宕妙有風致價甚高不可多得

魏太守觀

公名觀字杞山蒲圻人明祖下武昌聘授平江學正累官祭酒以衰老乞歸復召知蘇州府三年政化翕然修復府治爲御史張度誣奏伏法書學鍾元常稍變體製綽有風骨簡札傳世僅四五紙耳

周尚書 湏

公名湏字伯寧江寧人開國初爲湖廣都事洪武二年任刑部尚書明年降惠州經歷工詩兼繪事心畫亦精研作楷法特妙然結構頗多肉雖非墨豬大似楊家肥婢耳

鎰司業 崧

公名崧字子高初名楚泰和人洪武初以人材舉授職方郎遷北平副使坐事輸作京師還鄉久之召爲禮部侍郎復起爲國子司業西江詩派公爲之宗著槎翁集書體怪怪奇奇楷類楊鐵史故自饒趣

朱閣學 善

公名善字備萬豐城人元末隱居著述洪武初薦爲翰林修撰奏對失旨放歸尋召還授待詔升文淵閣大學士以疾賜歸卒著詩經解頤一齋諸集書工大行楷得宋劉無言神韻而有骨力

劉僉事承直

公名承直字宗弼章貢人至正進士贛人舉進士自公始明祖開國辟爲國子博士升司業出拜浙江按察司僉事詩工選體出入鮑謝閒書法圓熟規摹康

里子山尺牘墨氣古厚結字最大

張纂修簡

公名簡字仲簡號白羊山樵吳人初爲黃冠後返巾服洪武二年召修元史蔚有陶韋風書學率更稍放

宋舍人璲

公名璲字仲珩太史公仲子洪武九年召爲中舍十三年坐兄子慎胡惟庸黨牽累伏法方正學稱爲威鳳耕霄祥雲捧日書法全得筆諫公三昧而勁健有骨力亦稀少難得者

襲誠意廌

公名廌字士端文成孫參政璉子洪武二十三年襲封明年貶秩歸里築室西雞山下命曰盤谷建文長陵皆欲召用以奉親守墓辭永樂間卒於家著盤谷

集草書與解學士合轍

王博士 紳

公名紳字仲縉其父待制死節年才十三從宋文憲學奇之名其齋曰繼志洪武辛未應蜀王聘爲成都府學官自蜀之滇訪求待制遺殖作滇陽慟哭記建文朝召拜國子博士卒著繼志齋集書體清秀可愛

宋侍書 克

公名克字仲溫長洲人偉軀幹博涉書史洪武中徵爲侍書同知鳳翔府有南宮生傳書善草隸體多斌媚

錢提舉惟善

公名惟善字思復至正辛巳鄉試出羅剎江賦公據七發引用曲江爲錢塘江由是知名遂號曲江居士

官至副提舉明初徙居華亭卒著江月松風集手書傳世公書早年端嚴勁峭晚殊草率酬應矣

方參政 行

公名行字明敏國珍子仕元爲行省參政入明徙濠又戍滇宋金華稱其襟度瀟灑善談名理於書無所不讀詩律清新居然勝流也著東軒集書法體方畫正精能可愛

呂教諭 敏

公名敏字志學無錫人深衣幅巾爲道士服洪武初徵授無錫教諭十二年舉人才著無礙集擅楷法書不作行草結體頗豐肥有俊偉氣絕似北宋曾子布筆蹟也

劉市舶 儼

公名儼字敬思錢塘人元季不仕隱居西湖明初徵修禮樂書方輿續編授廣東市舶司令卒著樗隱集世行筆札絕似中書體雖束於繩墨惟入晉宋家數然亦波峭不流於俗

宋纂修立禧

公名立禧字無逸後單名禧姚江人少穎悟好學父欲奪其志於市井胥吏之事輒哭辭母爲資之負笈從師迄明經史之學洪武初召修元史著庸菴集書類馮海粟逸致翩翩也

王山人逢

公名逢字元吉江陰人徙居上海之烏涇築草堂以居號最閒園丁洪武中以文學錄用有司敦趣上道子掖官通事司令以父老泣請明祖詔吏部符止之

著梧谿集七卷書學張伯雨行筆稍弱然傳世甚少
戴山人良

公名良字叔能浦江人洪武六年天下大定變姓名
隱四明山海閒明祖遣使物色之十五年召試文詞
欲官之以老病辭忤旨次年卒著九靈山人集三十
卷

黃尚書肅

公名肅字子邕新城人元官禮部郎明祖開國自北
平馳見命仍故官升尚書王禕序其集

牛尚書諒

公名諒字士良東平人寓吳興洪武初以秀才舉六
年任禮部尚書尋降主事尋還任免著尚友齋集

朱尚書夢炎

公名夢炎字仲雅進賢人元進士入明爲太常博士
官至禮部尚書卒詩篇婉麗有晚唐風格

張徵君翼

公名翼字翔南建德人徙嘉興元末鄉舉薦授山長
不就明初徵入禮局告歸著梓字集

魯僉事淵

公名淵字道原瀋安人至正進士洪武初徵修禮樂
書授江西按察司僉事辭歸卒

錢博士宰

公名宰字子予一字伯均會稽人元進士明初以明
經徵修禮樂書授國子助教乞歸召爲會試考官較
書翰林應詔撰著稱旨加博士賜敕致仕有臨安集
行世

陳經歷汝言

公名汝言字惟允吳縣人淮張時辟藩府參謀親信用事內附後洪武初官濟南經歷後坐法當死臨刑猶從容作畫畫畢就戮婦吳育其孤繼遺書尚數萬卷云

金太守綱

公名綱字子尚嘉興人元季中鄉舉洪武初知蘇州府以上書請減賦額賜死

錢參政用壬

公名用壬字成夫桐川人甲寅科中南士第一名累升參政洪武初官禮部尚書致仕書瘦弱體近張雨

陳學士基

公名基字敬初臨海人元季授簡討參張士信軍事

遷學士明祖平吳召至金陵預修元史洪武中卒於
虞山著夷白集書法初學聖教序後竟變體瘦而頎
却清峭有風致

丘郎中民

公名民字克莊江都人洪武初爲松江府學訓導慕
學之士自遠而來一時文風之盛比之鄒魯云書法
似坡公晚年挾海上風濤之氣殊自奔放乃筆鋒復
偏側體多闢而扁亦明初風氣也

全殿學思誠

公名思誠字希賢華亭人洪武中以耆儒由學正徵
授文華殿大學士固辭賜歸書古勁有筆諫風度

余提舉詮

公名詮字士平仕元爲江浙儒學提舉洪武中僑居

大觀錄卷十

士怡寄軒

崑山著春草集書法端楷與俞紫芝同一機竅

李王相質

公名質字文彬德慶人元末以府掾聚兵保障肇慶諸郡明祖開國以全城歸附授中書斷事洪武初任刑部尚書出爲浙江參政終靖江王相以詩名世

吳尚書雲

公名雲字友雲義興人洪武初授弘文館校書郎升刑部尚書出爲湖廣參政招諭雲南死之

蘭府尹以權

公名以權字世衡西河人博學能詩洪武初選授中書省照磨仕終應天府尹

吳殿學伯宗

公名佑字伯宗以字行金谿人洪武辛亥初開科明

祖親製策問擢第一拜武英殿大學士著玉堂集

鮑殿學恂

公名恂字仲孚崇德人洪武初以耆儒徵賜坐顧問
命爲華蓋殿大學士輔導東宮及太孫固辭諭免早
朝日晏而入復固辭遣還著西谿稿

李尙書克正

公名克正字宗頤豫章人洪武初召爲禮部員外改
御史瓊州府吏告其守進表公坐僉名公鞫之抵吏
罪讞聞明祖喜超授禮部尙書卒工聲律

林翰林公慶

公名公慶字孟善括蒼人洪武三年出知松江府梁
寅石門集有天界寺與林翰林中秋分韻詩

桂長史德稱

公名德稱字彥良以字行慈谿人元季聚徒山中教授屢辟不起洪武六年待詔公車以白衣賜宴除晉府相十三年革府相改長史越六年賜歸卒

吳尚書 琳

公名琳字朝錫黃岡人明祖開國召爲博士歷浙江按察僉事洪武三年升吏部尚書出知黃州致仕

胡教授 翰

公名翰字仲申金華人明初大臣交薦上憫其老授衢州教授召修元史書成賜金帛遣歸隱居長山著胡仲子集

王徵士 彝

公名彝字常宗蜀人遷嘉定自號媯蜚子以布衣召修元史賜金幣遣還又薦入翰林以母老辭洪武中

坐魏觀獄誅著二近齋稿

貝助教 瓊

公名瓊字廷臣一字廷琚崇德人淮張專制避地及山洪武初徵修元史除國子助教致仕卒著清江集徐徵士尊生

公名尊生字大年嚴州人洪武三年詔修元史書成在局儒士壯者授官老者許歸公引年求去省臣留續修庚申君史又編集禮樂書書成求去益堅雖隸春官居然山林憔悴著守約齋集

陶祭酒 凱

公名凱字中立天台人早歲有名淮海間洪武初召修元史三年升禮部尚書出爲湖廣參政致仕八年召爲祭酒復以參政致仕自稱耐久道人

曾侍郎魯

公名魯字得之新淦人年七歲暗誦九經一字不遺
稍長取三史日記尋及其餘數千年閒國體人材制
度沿革咸能言之洪武三年召修元史編類禮書由
主事超拜侍郎歸卒著守約齋集

高太常巽志

公名巽志字士敏河南人元末僑居嘉興徙吳門洪
武初徵修元史入翰林遷侍讀學士建文初官太常
卿靖難後存歿不可考云著稽貴菴稿

孫司業作

公名作字大雅以字行一字次知江陰人著書號東
家子洪武初召爲翰林編修以病乞外教授太平召
還成均累升司業著滄螺集六卷

梁徵士 寅

公名寅字孟敬新喻人明祖徵四方名儒修述禮樂
公在禮局學者稱梁五經著石門集

汪高士克寬

公名克寬字德輔祁門人隱居教授召修元史固辭
不仕卒著環谷集

韓高士 奕

公名奕字公望吳人少目眇筮得蒙卦遂絕意仕進
扁其室曰蒙齋隱於醫郡守姚善造請不可得見作
壽藏支硎山下明初高士公爲領袖姚榮公序其集

王高士 賓

公名賓字仲光長洲人經書子史百家該覽貫穿問
無不知於醫學尤精平生不娶奉母至孝年七十先

母而卒有姑蘇雜詠同里好韓奕先生及姚榮國道衍

王高士履

公名履字安道崑山人能詩文工繪事精於醫藥著醫書累百卷洪武十六年秋游華山作圖四十幅記四篇詩一百五十首

王教讀行

公名行字止仲長洲人洪武初郡庠延爲經師晚年謝生徒居石湖瀕後坐藍黨伏法著楮園集

陶孝廉宗儀

公名宗儀字九成黃巖人少舉進士第一不中中郎棄去洪武六年舉人才至京以病辭家松江貶甕樹陰有所得摘葉書之世傳輟耕錄是也又著南村集書

法雍容儒雅氣象可觀

邵訓導亨貞

公名亨貞字復孺嚴陵人居華亭卜築谿上以貞谿自號洪武閒爲松江府學訓導卒年九十二著蛾術詩文集女嫁張宣藻仲卽奉詔歸娶者也書牘雅贍體尤專工篆隸

管長史 訥

公名訥字時敏華亭人洪武九年徵拜楚王府紀善之國後升長史王疏於朝永留本國祿之終身初從昭王破銅鼓蠻力請勿殄餘黨全活者衆生子因名延枝著四部集

貝紀善 翔

公名翔字季翔崇德人助教廷琚之子官楚府紀善

著平澹集書體似髣蘇側扁而拙

朱侍郎 同

公名同字大同休寧人洪武中以人才舉爲東宮官進禮部侍郎尋被誣得罪著覆瓿集

趙徵君 沆

公名沆字子常休寧人隱居東山師事黃楚望精易象春秋之學元季輔元帥汪同保鄉井授江南行樞密都事丙申內附洪武二年召修元史書成不願仕卒年五十二著東山集

朱長史 右

公名右字伯賢臨海人洪武三年召修元史及日歷除編修又修洪武正韻遷長史著白雲稿

周虞衡子諒

公初名愷以字行廬陵人召修禮書成授工部虞衡司主事

張員外 昱

公名昱字光弼廬陵人居杭仕元爲左右司員外行樞密院判官淮張開藩禮致不屈酒閒爲瞿佑誦歌風臺詩以界尺擊案淵淵作金石聲笑曰我死埋骨湖上得題詩人張員外墓足矣明祖徵至京憫其老曰可閒矣厚賜遣還遂號可閒老人年八十三而終有光弼集

吳太史志瀄

公名志瀄字主一以字行無爲州人仕元爲翰林待制濠泗兵起徙豫章遷鄞入明不仕著環碧軒柳南漁隱二集工古隸學孫叔敖碑虞道園贈詩有揮毫

妙得中郎法之句

高錄事明

公名明字則誠瑞安人元進士爲處州錄事明祖聞其名召之以老疾辭還著柔克齋集

滕學士克恭

公名克恭字安卿祥符人仕元爲學士避地錢塘洪武初兩聘充考試官年百餘歲卒著謙齋稿

藍布衣仁

公名仁字靜之崇安人元末謝絕科舉明初內附隨例徙濠尋放還有藍山集

王運司沂

公名沂字子與泰和人洪武初徵爲諸王說書授福建鹽運司副使以老辭歸學者稱竹亭先生後以孫

直貴贈宮師尚書公與弟佑俱以詩名顯有竹亭遺稿

王御史 佑

公名佑字子啓沂弟洪武中以校官拜監察御史出爲廣西僉事改知崇慶州有長江萬里稿

葉行人 顯

公名顯字伯愷金華人元末隱居不出刻其詩曰樵雲獨唱洪武中舉進士官行人司副使免歸

董僉事 紀

公名紀字良史上海人洪武初官江西僉事引疾歸有西郊笑端集詞翰絕工

馬太守 琬

公名琬字文璧秦淮人少有志節工詩畫洪武初仕

爲撫州知府有灌園集

周郡丞 矩

公名矩字仲方吉水人洪武初官中牟知縣遷台州府同知謫戍廬陵用薦爲其邑訓導

練通判 高

公名高字伯上新淦人子寧父洪武初知起居注直言忤旨出知廣德州歷臨汀鎮安通判

沈隱士 貞

公名貞字元吉長興人元末隱居橫玉山自號茶山老人明初不仕著茶山集

楊考功 彝

公名彝字宗彝餘姚人洪武初以人才舉後獻詩稱旨擢吏部主事尋謫滇著貴竹諸稿

戈主事 鎬

公名鎬字仲京鎮江人洪武初徵詣闕官禮部主事
著鳳臺集

范工部 準

公名準字平仲休寧人洪武初舉明經官工部主事
著壘甕何陋軒諸稿

謝吏部 徽

公名徽字元懿長洲人洪武初以布衣召修元史除
翰林編修改吏部郎中辭歸復起國子助教卒於官
與弟恭字元功並有才藻公嘗爲高青丘序姑蘇雜
詠有蘭庭集恭集名蕙庭

梅判官 頤

公名頤字昌年永嘉人以明經薦除都昌簿遷夔州

判官

劉翰林 紹

公名紹字子憲以字行建昌人洪武初官翰林應奉
遷國子助教致仕詩載元音遺響

王訓導 嘏

公名嘏字伯純河東人由鄉貢擢松江府學訓導嘗
護祖父妣三喪自揚州歸葬洪霍山鄉里重之

陳建德 鈞

公名鈞字衡臣羅源人洪武初以人才薦官建德縣
丞著退軒集

陶隱君 琛

公名琛字彥珩吳縣人隱居不仕徐良夫構耕漁軒
集諸名士題詠公有和倪元鎮作

董山人遠

公名遠字仁仲吳人明初不就徵辟徐氏耕漁軒中
勝流歎集公與焉城頭烏一篇見稱於時

陸河南仁

公名仁字良貴崑山人沈靜簡默詩文不苟作館閣
諸公重之稱陸河南

陸進士居仁

公名居仁字宅之華亭人泰定中鄉貢進士入明隱
居教授自號雲松野褐與鐵崖曲江同葬於山東麓

余新鄭堯臣

公名堯臣字唐卿永嘉人元末版授左司職銜明初
謫濠放還授新鄭丞著菜蕓集

舒聘君頔

公名頤字道原績谿人元末台州學正明初交章禮聘疾辭不出洪武丁巳考終於家著華陽貞素齋集七卷公少講明經史之學爲詩磐桓蒼古不習纖巧書法尤樸拙有古意

貢貞晦 悅

公名悅字友初初名性之世家宣城南湖故號南湖先生元季任閩省理官明初隱居越之山陰卒私謚曰貞晦一女適鎰渙有南湖集

陳推官 輔

公名輔字里無所於考明初仕爲推官詩附見滎陽外史集

鎰參軍 炳

公名炳字彥昂以字行鄱陽人明初獻書言事擢中

書典籤出爲都督府掌記有春雨軒集

郭參軍奎

公名奎字子章以字行巢縣人明初朱文正開大督府太祖命奎輔佐參謀文正得罪坐不諫阻誅公初從余忠宣闕學忠宣亟稱之世亂漂零江海仗劍從軍殆書生跨戎馬之場乎有望雲集

熊副使鼎

公名鼎字伯穎臨川人明初徵授中書博士遷起居注出爲浙江僉事改山東副使拜晉王右傅除參軍授岐寧衛經歷召還行至西涼猝遇害敕葬於黃羊

川

劉都憲駟

公名駟字宗道龍谿人洪武初倉攢以秀才徵試第

一拜左都御史後坐事徙滇有愛禮先生集公闢釋老甚嚴目佛爲泥廝游天蓋寺詩云若無僧寺塔直是一唐虞斯亦能言距楊墨者已

許給事伯旅

公名伯旅字廷慎黃巖人洪武初官刑科給事中著介石稿

張編修宣

公名宣字藻仲初名瑄江陰人父端字希尹鄉人稱溝南先主公少負才名洪武初以考禮徵尋預修元史擢編修上嘗呼爲小秀才年三十奉詔歸娶後謫濠道卒

俞都昌貞木

公初名楨以字行更字有立吳縣人洪武初用薦知

樂昌縣改都昌罷官家居坐事逮詣京師卒俞氏爲
吳中世儒公祖石礪先生精於易居南園號南園俞
氏公無子有雕木集

涂處士 幾

公名幾字守約又字孟規宜黃人嘗撰時事策十九
篇上之明祖未見錄用有涂子類稿

金縣尉 慎

公名慎字子肅嘉興人洪武初貢士官典史柿林新
居詩傳誦人口有柿林集

薛博士 敬

公名敬字原理鄞縣人洪武初舉茂才歷官國子博
士有江天集

周山長致堯

公名致堯字煥文崇德人平江書院山長詩存橋李
英華湖海耆英集石倉詩選

劉山長 煥

公名煥字彥亭山陰人元季薦授三茅書院山長道
梗不赴入明不仕詩酒自娛洪武中卒

凌教授雲翰

公名雲翰字彥耕錢塘人元末蘭亭書院山長洪武
中薦授成都教授有柘軒集

胡教授 奎

公名奎字虛白海寧人明初寧府教授著斗南老人
集公嘗泊舟鄱陽湖亭見石刻坡公黑雲堆雨未遮
山絕句次和書壁俄見一叟來誦其詩曰子非斗南
老人耶因長揖回顧不知所之遂以自號

殷文懿 奎

公名奎字孝章崑山人洪武初薦試高等例授郡縣職以母老請近地便養忤旨除咸陽教諭念母致疾卒於官年四十有六私謚文懿有支離稿婁曲叢稿道學統系圖諸書

虞廣文 堪

公名堪字勝伯家長洲洪武中爲雲南府學教授卒於官公宋丞相雍國諸孫藏書甚富手自編輯好爲詩兼善山水吳中故世儒家虞氏與南園俞氏爲最兩家子姓至弘治中絕矣公有鼓枻稿

朱教諭 昇

公名昇字彥升無錫人洪武中舉明經任本縣訓導升上虞教諭

吳教授舜舉

公名舜舉字士源歙人洪武初以耆儒舉久之除徽州府學教授有石谿吟稿

鄭教授真

公名真字千之鄞縣人洪武壬子鄉試第一授臨淮教諭秩滿朝京賜燕殿上微員恩遇數爲至榮升廣信教授引年乞歸著榮陽外史集宋潛谿極重其文推使獨步

劉徵君仔肩

公名仔肩字汝弼鄱陽人洪武初用薦應召至京集都人士詩爲雅頌正音

王編修翰

公名翰字時舉夏臺人明祖徵爲周藩相王素驕有

異志正諫弗納斷指佯狂去王敗得免坐起授翰林
編修謫廉州獠蠻亂抗節死著敝帚樵唱梁園諸集
書法圓熟頗得山陰家範

顧教授 祿

公名祿字謹中華亭人除太常典簿爲蜀府教授公
少有才名其所著詩曰經進集解大紳嘗入便殿見
御前置公詩數帙蓋經進御覽云書牘傳世甚多而
於篆隸尤精

童教授 冀

公名冀字中州金華人洪武丙辰被徵修書尋職教
全湘轉湖州教授遷北平卒著和陶集爲姚少師手
錄傳世書牘貴重不凡具一種峭媚之致深得元人
風格聲價亦昂

烏大令斯道

公名斯道字繼善慈谿人明初以薦起知石龍縣調永新尋歸田書學歐體筆畫健勁而長楷法尤妙

唐翰林 肅

公名肅字處敬會稽人九歲入郡庠至正己亥中鄉舉明初選入誥局尋徙濠召修禮樂書擢翰林編修以疾失朝免官歸謫佃濠之瞿相山卒著丹崖集子之清函骨歸葬書體高華繪事亦妙

謝僉事 肅

公名肅字原功上虞人與唐處敬稱會稽二肅洪武中官福建按察司僉事風裁凜然著密菴集

藍僉事 智

公名智字明之崇安人洪武初應辟薦授廣西按察

司僉事著藍澗草堂集書學二王頗豐豔肉多於骨
林太守弼

公名弼字元凱龍谿人初名唐臣明祖開國以儒士
徵登春官修禮樂書除禮部主事使安南却餽千金
尋坐事徙濠安南亂召起再使還擢知登州府卒於
官著梅雪集筆牘多草書以骨取勝

沈徵君夢齡

公名夢齡字元昭湖州人博通羣經尤邃於易洪武
初聘爲京闈考官辭免著花谿集尺牘小行書工綴
劉布衣永之

公名永之字仲修清江人詩文清麗爲時所重家故
饒貲泊然布素以翰墨自娛客至不設珍饌酒數行
焚香賦詩而已著山陰集書法篆楷行草皆有師承

而精造獨得

張布政 紳

公名紳字仲紳濟南人洪武中任浙江布政使卒公
有才略詩文自名一家書法瘦而頗棱棱具風采

涂博士 穎

公名穎字叔良進賢人元季從余廷心學居金陵明
初歷任太常博士書工篆隸行草綽有姿致

揭大令 軌

公名軌字孟同臨川人僉斯孫洪武中任清河知縣
嘗主江西鄉試書多楷法但行筆如蠅縮耳

周經歷 啓

公名啓字孟啓廣信人洪武中以文學薦授贊禮郎
遷都督經歷卒著嘉定集詠萊稿

任萬戶 原

公名原字本初休寧人明祖下徽州出家財佐軍從
捍禦功加將軍萬戶書似東坡而結體瓠肥

葉主簿子奇

公名子奇字世傑龍泉人明祖開國用薦主巴陵簿
洪武中以祀神羣吏竊飲豬腦酒爲縣學生發露連
染繫獄關索中取瓦磨墨有得輒書事釋家居足成
之號草木子書體瘦硬守谿閣老殊有虎賁典型

吳藤州 植

公名植字子立嚴州人洪武中以處士徵授藤州知
州別自號白玉壺善小草書甚精

許訓導 繼

公名繼字士修寧海人洪武中徵爲台州學訓導卒

年僅三十七喜爲詩高妙處不減魏晉人風韻別自號觀樂生宋金華爲立傳公對知己語每忘寢食遇俗客往往不交一談著觀樂生集書精小楷

陶員外 誼

公名誼字漢生天台人洪武中用薦起家仕終禮部員外有詩刊皇明雅頌書體圓活似蔡卞一種

元高士 宣

公名宣字伯常元之遺民明之隱淪也詩刻許中麗光岳英華書牘工行押頗疎澀自成一家

危太學 進

公名進字伯明太樸子詩列光岳英華二體詩中其七言律音響琅琅書有父風

朱舍人 芾

公名希字孟辯以字行華亭人才思飄逸千言立就
洪武中官編修中舍楷書出規入矩草篆有別趣

周處士 砥

公名砥字履道吳人寓無錫工文詞兵亂避地荆谿
依馬孝常久之遁歸吳與高楊諸人遊書畫大進尋
又去之會稽歿於兵有謂公於洪武時曾授州判歷
仕四十年皆委巷之談也書工小行押似倪迂一派

馬建昌 治

公名治字孝常義興人初爲僧與周履道窮覽陽羨
山水之勝作荆南倡和集鄭明德爲之序洪武初除
知內丘縣官至建昌知府書牘特精楷法筆帶正鋒
絕有古意

盧兗州 熊

公名熊字公武崑山人精於六書洪武中以能書授中舍出知兗州坐累死籍其家惟麻桌一篋明祖深悔之所著有說文字原章句鹿門隱書蘇州兗州志孔顏世系譜尺牘多大草書甚奇崛

袁訓導華

公名華字子英崑山人讀書過目成誦洪武中官郡學訓導坐其子爲吏被罪卒公善書小楷最精妙

秦教諭約

公名約字文仲淮安人徙崑山洪武初召試慎獨箴拜禮部侍郎以親老辭歸再徵起明祖憫其衰邁不任繁劇詔授五百里內儒官得溧陽教諭引年乞休著樵海集書牘與袁子英同調

馬處士麟

公名麟字公振崑之東滄人酷志讀書好文尚雅以華其家聲築室松南園池臺榭幽閒自娛屏絕世慮日誦經史流連觴詠著草堂醉漁二集行世工心畫長於尺牘爲時流愛慕

呂布衣 誠

公名誠字敬夫崑之東滄人博貫經史家有來鶴亭梅雪齋日與名士郭義仲陸良貴唱和其間詩格清新塵羹土苴爲之洗淨屢聘堅臥不起考終於鄉人服其達書工楷法

詹中舍希源

公名希源字孟舉徽人徙居金陵洪武中官中書舍人正書體兼顏柳大字愈妙闕廷榜額多出其手

偶吏曰 桓

公名桓字武孟太倉人性落拓嗜酒游於諸公閒洪武中舉秀才仕終荊門州吏目公眇一目每自題瞎牛性又方嚴人號爲瞎虎著江雨軒詩集書法大雅不羣墨林稱之

郊府掾 韶

公名韶字九成吳興人好讀書慷慨尚氣節辟試漕府掾不事奔競以詩酒自娛書兼衆體流麗可喜

趙翰林 倣

公名倣字本初紹興人洪武中授太學博士尋加翰林致仕詣闕謝辭賜帑錢遣歸朝廷榮之書法逼古

易徵士 恆

公名恆字久成廬陵人家崑山闢地數百弓引泉蒔花名曰泗園洪武中薦入京尋免歸書蹟頗放不整

申屠修撰衡

公名衡字仲權大梁人徙長洲洪武中徵草諭蜀文授修撰尋謫濠卒著叩角集書體豐肥類楊鐵史

錢徵士達

公名達字伯行長洲人良右子博通經史明祖有天下徵赴太常議禮尋以元故官發鳳陽居住洪武十六年以事起遣入京明年卒於京邸公美詞翰篆隸行楷皆精學鮮于太常閒出入舜舉法度

張工部適

公名適字子宜吳江人幼穎悟目爲聖童洪武中舉秀才擢都水郎病免得朱長文樂圃故地與周正道陳惟允輩觴詠復以明經舉授廣西理問厯滇池大使卒著甘白樂圃諸集書工行楷結構圓熟

周徵士南老

公名南老字正道吳人明祖徵赴太常議禮尋徙濠放還卒倣季迪著姑蘇雜詠書牘小行押極波峭

徐廣文達左

公名達左字良夫吳縣人隱居光福山號耕漁子洪武中授建寧訓導卒於官書法隸多正行頗窘澀

張廣文展

公名展字翰宸嘉定人與弟粹中並有文才官訓導坐累死書體似張芝小字尤瘦峭可觀

許隱君觀

公名觀字瀾伯吳城人號南郭民養高不仕同時有許觀亦字瀾伯殉建文之難與此不同書有晉宋風

卞布衣同

公名同字孟符吳人東修砥行不受徵辟以詩名世
書法似坡公邈邇無拘檢

袁憲史養福

公名養福字能伯吳郡人仲長子洪武中爲福建憲
史行潔負才氣工詩善書結體豐肥而有古致

顧郎中文煜

公名文煜字光遠嘉定人明祖開國命監大軍倉累
擢廣東行省郎中洪武中拜吳王相以他事註誤逮
問卒詩格清婉晚號蔗境翁著蔗境吟稿書法類歐
陽圭齋端方整勁中自有韻度

張同知 著

公名著字則民永嘉人元末游學至常熟值兵亂道
梗遂家焉洪武中領鄉薦授膚施知縣升臨江府同

知筆牘多人行書結體豐肥古厚饒骨力明初書家渠帥也

陶教諭 振

公名振字子昌吳江人徙華亭洪武中以明經授吳江學訓導上紫金山等三賦改安化教諭歸隱九峯閒一夕死於虎著釣鼈集書法殊豐肥而點畫波磔頗歛束故體勢短澀云

陳郴州 璧

公名璧字文東華亭人博學能詩洪武中以秀才授解州判調郴州卒書工小行押圓熟有力具入木勢

張尚書 籌

公名籌字惟中無錫人洪武中以薦授翰林應奉久之擢禮部尚書尋降員外書多小楷澀滯不入格

瞿參政 莊

公名莊字敬孚常熟人以薦擢翰林典簿累升福建參政文學蔚茂宋景濂稱之書亦古樸

蕭隱居 規

公名規字元則長沙人徙吳其學擅麟經毛詩號竹園先生著湖山樵寓集

包同知 聖

公名聖字師聖江陰人號鶴洲野人洪武中任岳州府同知弟英字仲蘊官司訓號靜逸老人

朱朝列希晦

公名希晦樂清人明祖召至京授朝列大夫不受歸幅巾短策優游林壑著雲松巢詩二卷

林繕部 鴻

公名鴻字子羽福清人少任俠不羈洪武中以人材
薦授將樂訓導久之擢繕部員外明祖臨軒試龍池
春曉孤鴈二詩名動京師性脫落不善仕年未四十
免歸爲閩中詩社宗主

浦舍人源

公名源字長源無錫人洪武中爲引禮舍人入閩與
林鴻結詩社著舍人集

桂奉祠衡

公名衡字孟平仁和人洪武中爲錢塘學訓導轉公
府奉祠卒書法秀異行草入妙

金隱居信

公名信字中孚金華人以茂才舉不赴隱居自怡人
稱漫吟先生有春草軒集

朱教諭應辰

公名應辰字文奎吳人洪武初應詔起奏乞近地養親得本郡儒學訓導改江陰卒公博綜多技能篆籀得古法孝陵嘗命書符印著漱芳集三卷楊鐵崖爲點定

邾進士經

公名經字仲誼仁和人元末中進士入明不仕徙居滇南詩見滄海遺珠有玩齋稿

梁贈公蘭

公名蘭字庭秀一字不移泰和人贊善潛之父有畦樂先生集

鄭處士挺

公名挺字叔高浦江人與弟欽字叔韓榦字叔恭俱

大觀錄 卷十

三怡寄軒

爲義門才子以詩鳴洪永間

謝教讀 林

公名林字瓊樹武進人應芳子入明不仕隱居授徒家無儲粟不爲愁苦之言著雪窩稿

蕭長史 岐

公名岐字尚仁泰和人明初以賢良徵爲潭府左長史固辭謫楚雄教授改平涼著正固集

鄭參政 桓

公名桓字居貞歙人洪武中舉明經官至河南參政永樂初坐方黨死著檜庭諸稿皆手抄今傳於世

林春坊 右

公名右字公輔臨海人洪武間春坊大學士輔導皇太孫坐事謫教授挂冠歸有林公輔集

陳聘君 謨

公名謨字一德號心吾泰和人洪武初聘修禮書辭歸教授鄉里楊文貞梁畦樂爲及門弟子校文廣東孫蕢其所取士幅巾野服翹翔山澤閒門生兒子扶攜後先使人望而敬之

孫典籍 蕢

公名蕢字仲衍南海人洪武中進士由縣簿入爲翰林典籍復補平原簿坐罪輸作左校操版築望都門以吟督工者聞狀召對原之除蘇州府經歷戊遼連染涼國獄見殺臨刑有黃泉無客店今夜宿誰家之句明祖惜之至殺行刑者書體圓熟入褚河南堂奧精妙絕倫

李大令 德

公名德字仲修番禺人洪武庚戌以明經薦授長史
歷升廣西義寧知縣致仕歸卒著易菴集

黃府判 哲

公名哲字庸之番禺人明祖開國任翰林待制奉使
青齊敕知東阿縣潔己施惠流移復業升東平通判
上書言時政忤旨放歸尋以他事實於法性好山水
結廬蒲礪著雪篷集

王給事 佐

公名佐字彥舉南海人開抗風軒招延名士洪武中
徵拜給事中著聽雨軒集書體端勁絕似王安禮

趙布衣 介

公名介字伯貞番禺人老於布衣不應徵辟著書自
娛廣中五先生之一也著臨清集

方知府克勤

公名克勤字去矜寧海人正學父明祖徵詣闕歷仕知濟寧府爲縣令誣奏御史下其事被逮卒

葉訓導居昇

公名居昇字伯臣浙之寧海人任山西平遙訓導應詔上萬言書明祖惡其切直逮問瘐死

張高士樞

公名樞字夢辰陳留人徙華亭築室曰讀書莊人勸之仕不應日與子弟講春秋及唱和爲樂世以是高之目之曰林泉民年八十餘乃終書工行楷陶南村贈詩有鈔書竹蘭拈鮮碧臨帖箋藤寫硬黃之句

莫助教士安

公初名伋以字行更字維恭歸安人洪武初爲府學

教授遷知黃岡縣入爲助教永樂間治水江南遂僑居無錫自號柏林居士又號是菴書畫卷軸題跋最多

李助教 暉

公名暉字宗表錢塘人洪武初官國子助教著草閣集

郭定襄 珏

公名珏字景南定襄伯登之父年十三作憫農詩大旱爲霖賦明祖召見敷對詳明極眷愛之

冷太常 謙

公名謙字啓敬杭州人精音律工繪事明祖徵爲太常協律郎郊廟樂章多所裁定後以失金詞語株連逮至中途吸水於瓶隱身入瓶中逮者持至御前就

瓶中應奏明祖怒擊瓶碎地片片皆響應終不知所
在公少遇異人傳幻術此事雖與左慈相類然守谿
諸公載之非無稽也書法張芝入手牘最貴重

方侍講孝孺

公名孝孺字希直世居臨海侯城里故學者稱侯城
先生洪武中召至京除蜀王府教授獻王師事之名
其讀書之室曰正學建文朝召爲翰林博士進侍講
靖難時以死殉遜志齋集四十卷王稔收藏之

茅都憲大方

公名大方字希董泰興人洪武間教授淮安考績入
朝擢長史建文時任都御史殉節著希董堂集

練都憲子寧

公名子寧初名安以字行新淦人洪武朝榜眼授修

撰累升侍郎建文卽位擢都御史燕師入命縛公對御多慢語斷舌族誅禁不得藏隻字宣德後禁稍弛詩文遂行世書得章草體拙多於巧

黃太常子澄

公名湜字子澄以字行分宜人洪武中進士第一人授翰林編修累官太常寺卿建文卽位倚公爲政燕師靖難執公責問侃侃不屈誅死族其家宣德後禁網稍弛詞翰閒出云

黃侍中觀

公名觀字瀾伯一字尚賓貴池人初從父贅姓許洪武二十一年會試廷試皆第一累官侍郎建文期改侍中與方黃並見信用奉詔募兵聞遜位投李陽河湍死書體古拙

王修撰叔英

公名叔英字原采黃巖人洪武末爲學官建文元年
召爲翰林修撰靖難師逼江奉詔募兵行至廣德聞
遜位沐浴具衣冠書絕命詞自經元妙觀銀杏樹下
著靜學齋集

程僉都本立

公名本立字原道桐鄉人洪武中除周府禮官進長
史坐累謫雲南吏目建文初召爲翰林纂修官升僉
都御史坐失陪祀謫江西副使未行聞燕師靖難殉
節死著巽隱集

唐侍讀之瀾

公名之瀾字愚士以字行山陰人肅之子建文二年
召爲翰林侍讀明年病卒公長身巨鼻博聞多識練

達世故尤長於詩翰酒酣落筆煙雲滿紙篆隸得斯
冰體楷法從歐陽率更出

龔安節 詡

公名詡字大章崑山人父給事督戍五開死公年十
四勾補伍調守金川門靖難兵入大慟變姓名遯歸
更二十年禁稍解賣藥授徒周文襄薦不起曰恐負
往日城門一慟耳著野古集書體與姚樞同

嚴尚書震直

公初名子敏字震直因御呼其字互易焉烏程人明
初由糧長授通政司參議累官工部尚書永樂初宣
諭山西卒於澤州世傳公奉詔訪建文於滇遇帝吞
金死妄也著遺興集收藏有休堂印書法古妙

漏侍御 瑜

公名瑜字叔瑜一字大美會稽人革除間官監察御史潛跡江湖爲烏鎮九老之一著石軒集

魏尚書 澤

公名澤字彥恩溧水人刑部尚書謫寧海典史藏方正學藐孤者也書體精妙宋思陵殆爲脫胎

林紀善 溫

公名溫字伯恭永嘉人起家進士官秦府紀善著栗齋集宋景濂爲之序書工行草酷肖山谷

葉主事見泰

公名見泰字彝仲臨海人中鄉舉仕終刑部郎著蘭莊集與弟惠仲稱二葉書法類洪舜俞

李尚書 鋼

公名鋼字至剛以字行雲間人以字行舉秀才累官

禮部尚書永樂中知興化府書法得歐陽圭齋神韻

宋山人 廣

公名廣字昌裔號東海漁者又號桐栢山人家吳郡草書宗章草與仲溫仲珩以書名天下稱三宋

姚少師道衍

公名道衍字斯道族姓姚長洲相城人元季削染爲僧洪武中命侍燕邸靖難起兵贊助祕密卽位後賜名廣孝卒謚恭靖封榮國公著獨菴逃虛子諸集書體穎鋒尖銳東牘古宕自成一家

解學士 縉

公名縉字大紳吉水人洪武末進士授中書庶吉士明祖極愛之每侍書至親爲持硯除御史好直言上惜其才命養親歸里文皇卽位進學士直文淵閣逾

年出爲廣西參議尋被譖下獄死或云沃以燒酒埋雪中死著春雨齋集工草書頗豐厚而狂怪自恣

王吏部璉

公名璉字汝器長洲人洪武中以會試舉子授編修肄業文華堂後歷官吏部主事卒正書玉潤似紫芝

王賓客璉

公名璉字汝玉以字行璉弟洪武末薦擢五經博士靖難後進檢討贊善應制撰龜賦居第一名大噪洪熙初贈太子賓客謚文靖著萍居集書法與兄璉風格略同弟璉字汝嘉明經入翰林名亦相亞

瞿長史佑

公名佑字宗吉錢塘人洪武中以薦歷仁和臨安訓導升長史永樂間下詔獄戍保安洪熙初赦還主英

國公家塾卒年八十七著翦鐙新話存齋樂全諸集
書法從元人出與趙仲穆同一結構

王舍人 紱

公名紱字孟端無錫人洪武中徵入官事累戍朔州
永樂中以善書供奉祕閣授中書舍人扈從北京尋
卒於官公襟度瀟灑書畫兼詣而東牘多小行楷聲
價之重每幀殆與公所繪窠木竹石相埒也

楊少師士奇

公初名寓字士奇以字行泰和人由辟召事建文入
翰林靖難後改編修累官少師華蓋殿大學士正統
六年卒謚文貞詩文號臺閣體著東里集公書牘甚
富多中書捉筆其大書真蹟蒼古有骨斯辨之矣

楊文敏 榮

公初名子榮字勉仁建安人建文二年進士靖難後入直內閣更名榮累官工部尚書謹身殿大學士謚文敏公迴翔館閣朝廷高文典冊多出其手著退思集書法同危太僕而稍變其度正書最精妙

楊少保 溥

公名溥字弘濟石首人建文二年進士靖難後除太子洗馬下詔獄宣德初直內閣歷官至少保武英殿大學士正統間卒謚文定公長繫得釋登庸政府遲東西二楊者二十餘年云書體肥瘦不齊楷精行熟

胡閣學 廣

公名廣字光大廬陵人建文二年擢進士第一更名靖革除後直內閣復名廣歷翰林講讀文淵閣大學士卒贈禮部尚書謚文穆著冕菴厯從諸集書體從

松雪翁出然時時帶中書氣

金少保幼孜

公字幼孜名善以字行新淦人建文元年進士乙科授戶科給事中靖難後改檢討升文淵閣大學士歷官太子少保禮部尚書居綸閣垂三十年著詩文全集及北征諸集宣德六年卒謚文靖書工行押結體豐滿而有力暈東牘每用月白箋製式極佳元康里子山其丰致約略相似也

夏忠靖原吉

公名原吉字維詰湘陰人以鄉薦入太學授戶部主事建文朝升侍郎靖難後進尚書遣視江南水利洪熙立復戶部尚書加少保宣德中卒謚忠靖書法端楷無縱放欹仄之態

黃文簡 淮

公名淮字宗豫永嘉人洪武中進士靖難後召入內閣成祖北狩以春坊大學士輔導東宮尋繫詔獄者十年洪熙立仍入內閣累官少保戶部尚書正統中卒謚文簡著介菴歸田諸集書擅楷法似率更而瘦勁

胡賓客 儼

公名儼字若思南昌人洪武末中乙科靖難後召直內閣升祭酒洪熙初致仕卒公在政府持論切直爲同官所嫉老爲儒臣不得大用著頤菴集書體圓活與曾子榮相似頗豐滿

沈學士 度

公名度字民則號自樂松江人永樂中任中書舍人

大觀錄 卷十

吳怡寄軒

累官翰林學士楷書姿媚中帶古雅隸師陳文壁

沈奉常 粲

公名粲字民望七歲能草書官翰林侍講升太常卿
成祖謂其書與兄度爲一代義獻

沈員外 藻

公名藻字仲藻度之子官中書舍人升禮部員外書
兼正行草不失家學

梁贊善 潛

公名潛字用之泰和人洪武末中鄉舉永樂初召修
實錄累官春坊贊善成祖北狩留輔東宮監國被讒
死於法著泊菴集

梁典籍 時

公名時字用行長洲人洪武中以善書選授岷府紀

善靖難後官翰林典籍修永樂大典卒書體豪放

黃檢討 守

公名守字約仲以字行莆田人任翰林院檢討著靜齋集書體似文潞公

王學士 達

公名達字達善無錫人洪武中薦爲國子助教永樂朝累官翰林學士著耐軒天游二稿書近中書體

曾襄敏 棨

公名棨字子啓永豐人永樂甲申狀元授修撰入文淵閣召問典故奏對如響歷春坊大學士宣德初進少詹事卒贈禮部侍郎謚襄敏著古廉集書工行草墨氣光潤如玉有蔡忠惠風度

王尙書 英

大觀錄卷十

罕怡寄軒

公名英字時彥金谿人永樂甲申進士選庶吉士入文淵閣進呈機密章奏累官禮部尚書卒謚文安改謚文忠著泉坡集書工楷法風度棱棱藹乎如垂紳搢笏雍容廊廟

王冢宰直

公名直字行儉泰和人永樂甲申進士選入翰林累官太子太保吏部尚書卒贈太保謚文端著抑菴集公含咀英華文章典雅書體尤端整清潤雖行押亦斤斤不失矩矱

周文襄忱

公名忱字恂如廬陵人永樂甲申進士選庶吉士宣德中超拜工部侍郎巡撫江南奏免浮糧民霑惠愛升戶部尚書改工部景泰中致仕卒謚文襄著雙崖

集書牘多大字如學子法帖式

李祭酒懋

公名懋字時勉以字行安福人永樂甲申進士讀書文淵閣仕終國子祭酒公事熙宣兩朝再下詔獄縛送西市逮事裕陵荷校國學門皆瀕死得釋卒謚文毅改忠文著古廉集楷書遒勁固有能品但稍束耳

陳祭酒敬宗

公名敬宗字光世慈谿人永樂甲申進士選讀中祕書進翰林待讀宣德中升祭酒居國學二十年諸生多躋卿貳公獨久不調澹如也卒謚文定著澹菴居士集書行草楷諸體俱規撫晉宋而自然入格

李布政昌祺

公名禎字昌祺以字行廬陵人永樂甲申進士選庶

吉士仁宗監國以才望出爲廣西布政改河南宣德朝致仕公剛毅方直居官所至有風裁富於才情多所結撰著容膝齋集運甓漫稿

周庶子 述

公名述字崇述吉水人永樂甲申進士第二人歷官春坊庶子著東墅集

章侍御 敞

公名敞字尚文會稽人永樂甲申進士改庶吉士授刑部主事累升禮部侍郎著質菴集

周詹事 孟簡

公名孟簡字孟簡吉水人永樂甲申進士第二人官詹事府丞遷襄府長史著竹欄集

尹侍講 鳳岐

公名鳳岐字邦祥吉水人永樂丙戌進士官翰林侍講有詩集

黃學官 立

公名立字立之侯官人林鴻入室弟子以歲貢入成均任泉州訓導有詩集

何太守 澄

公名澄字彥澤江陰人建文時舉人永樂中歷官知袁州府有集

張修撰 洪

公名洪字宗海常熟人洪武中坐累戍滇帥臣薦爲靖府教授永樂中擢行人奉使日本緬甸諸國越二十年洪熙初召授翰林修撰引年致仕鄉邦制作多出其手書體作小行楷而斤斤守繩墨

曾侍讀 烜

公名烜字日章以字行吳江人洪武間以歲貢知黃陂縣考最升翰林院侍讀預修永樂大典尋奉詔使交趾道卒富良江書法筆古墨厚脰脫虞永興而得其溫粹之氣者

陳侍郎 璉

公名璉字廷器東莞人洪武中以明經薦爲教授永樂中由牧守憲司入爲通政掌國子監事官終禮部侍郎有琴軒文集三十卷詩十二卷

虞大理 謙

公名謙字伯益金壇人洪武中由太學生擢刑部郎守杭永樂中召爲大理寺少卿仁廟監國奏除都御史及卽位拜大理卿工詩著玉雪齋稿善寫山水木

石得雲林風致書法端勁古厚但微帶殿閣體

趙尚書 扛

公名扛字雲翰祥符人洪武中由鄉舉授兵部郎超拜浙江參政靖難後召爲刑工禮三部侍郎尋擢禮部尚書改兵部洪熙立又改刑部著僉父集西楊閣老爲作石田茆屋記

陳員外亢宗

公名宗字亢宗以字行永嘉人官止兵部員外賜午門觀鐙詩宣廟品爲擅場工草法瘦勁有骨

陳五經 繼

公名繼字嗣宗吳縣人汝言子生數月而孤奉母至孝上聞使直指廉之方隨母灌園母以壺漿授之拜而後飲上嗟異驛召爲五經博士進檢討著怡菴集

書牘行筆古勁結體如蠶菽許

熊贈公直

熊公名直字敬方吉水人永樂中舉人子概登第爲御史猶列名太學生獻陵聞而嘉之卒用概贈都御史初冒姓胡楊東里送胡敬方序卽公也而公自著西欄集已從熊姓云

王檢討僊

公名僊字孟揚閩人弱冠領鄉薦永樂中以國史院檢討充大典副總裁從張輔征交趾參軍事坐解縉黨下獄死著虛舟集書牘多大字棱角峭厲墨采濃潤楮素精佳行書尤貴重不凡

程太常南雲

公名南雲字清軒建昌人永樂中授中書舍人累官

太常卿宣德七年御書所賦草書歌賜之朝廷以爲榮書法真草隸篆四體俱工而篆尤秀整得秦斯陽冰之遺

高典籍 標

公名棟字彥恢仕名廷禮長樂人永樂初以布衣召入爲翰林待詔久之升典籍卒於官著嘯臺木天諸集選唐詩品彙九十卷拾遺十卷畫得米家父子三昧書工漢隸時稱三絕

金侍郎 問

公名問字公邁吳縣人永樂初以楷書薦授司經局正字歷官禮部侍郎

林侍講 環

公名環字崇璧莆田人永樂丙戌擢進士第一歷官

侍講歷從北京卒著網齋集書工狂草

袁寺丞珙

公名珙字廷玉以字行鄞縣人善風鑑識長陵於潛
邸官終太常寺丞著柳莊集書法淋漓活潑

袁尚寶忠徹

公名忠徹字靜思承其父太常家學歷官尚寶司少
卿著符臺集書法尖峭有生趣墨氣亦滋潤

錢侍郎習禮

公名幹字習禮以字行廬陵人永樂辛卯進士改庶
吉士歷官禮部侍郎卒謚文肅有應制集

熊都院概

公名概字元節吉水人永樂辛卯進士榜姓胡除御
史觀察廣東西宣德初擢大理卿巡撫兩浙及蘇松

諸郡升南京都御史掌院事兼署刑部卒於官著芝山居士集

苗少傳 衷

公名衷字秉彝定遠人永樂辛卯榜眼累官兵部侍郎兼學士入直內閣進尚書卒贈少傅謚文康

馬狀元 鐸

公名鐸字彥聲長樂人永樂壬辰進士第一人除翰林修撰有玉巖集

陳僖敏 鎰

公名鎰字有戒吳縣人永樂壬辰進士官至太子太保都御史卒謚僖敏著介菴集

郭尙寶 武

公名武字吳隆鉅之長子定襄伯登其同母弟也仁

宗召試援筆成章時方總角甚器重之官尚寶司丞
定襄爲編其父鉉及公詩凡二十二卷爲聯珠集長
沙李少師序而行世

沐武襄 昂

公名昂字景顥黔寧王子定遠王弟以都督鎮守雲
南平麓川寇卒贈定邊伯謚武襄著素軒集滄海遺
珠集亦公所薈萃也

陳少保 循

公名循字德遵泰和人永樂乙未狀元景泰中官至
戶部尚書少保兼華蓋殿大學士英宗復辟戍鐵嶺
有東行集句千首在戊午年放還著芳洲集翰牘作
行狎結字多側扁

高太保 穀

公名穀字克用興化人永樂乙未進士累官少傅工部尚書謹身殿大學士卒贈太保謚文義

金主事 誠

公名敘字功敘吉水人永樂戊戌進士仕至翰林學士久居禁近多所論列著石谿集書體類桐村

晏御史 鐸

公名鐸字振之富順人永樂戊戌進士改庶吉士授福建道御史貶上高尉稱景泰十才子著青雲集嘗採洪永兩朝知名士詩歌編次成帙目曰鳴盛集

魏尚書 驥

公名驥字仲房蕭山人永樂乙酉舉人由訓導累官禮部尚書致仕卒年九十八謚文靖著南齋前後集公仕宦四十年官階二品年近百齡可稱五福渾圓

之鉅公長德矣書法結體頗大全學永興

于少保謙

公名謙字廷益錢塘人永樂辛丑進士宣德中以兵部侍郎巡撫梁晉歷十八年還部正統北狩景泰立拜兵部尚書加少保復辟後死西市天下冤之成化初謚忠愍改謚忠肅著節閣集書法從趙文敏出莽蒼有骨力然亦稍帶中書氣按明初以謙名者甚多如虞謙王謙之類是也余惟簡翰以有姓者爲佳蹟

薛文清瑄

公名瑄字德溫河津人永樂辛丑進士歷大理卿人呼薛夫子忤王振將殺之振囊下奴抱薪而泣人怪之曰聞欲殺薛夫子耳振心動乃免仕終禮部侍郎入內閣謚文清著河汾集書體豐偉具端方象

劉忠愍 球

公名球字求樂安福人永樂辛丑進士官翰林侍講
正統間應詔陳言王振矯旨就朝堂摔繫詔獄斧鑕
交下麤爛死布衣成器設位龍泉山祭之名曰祭忠
臺著兩谿集書法古厚結體充碩

徐武功有貞

公名有貞字元玉初名瑄吳縣人宣德癸丑進士選
庶吉士歷春坊諭德以僉都御史治河張秋天順復
辟用奪門功拜華蓋殿大學士兵部尚書封武功伯
尋戍金齒赦還卒書學柳誠懸而行草別自成家

劉僉事 珏

公名珏字廷美長洲人宣德中領鄉薦除刑部主事
遷山西按察司僉事年甫及艾棄官歸操履清白工

唐律人稱劉八句精於鑒古購藏甚富畫宗黃鶴作寄傲圖十景詩名完菴集書學松雪墨氣古厚

張仙史復陽

公名復陽字南山平湖人棄家學道時作雲水游與尹蓬頭爲侶壽八十八尸解去香氣經月不散今其棺以鐵索懸餘杭洞霄宮一枝堂後如寶器焉作徑寸大字極有風骨小行楷書秀整不凡

劉閣學定之

公名定之字主靜永新人正統丙辰探花以太常卿入南閣進侍郎卒謚文安著呆齋集書體風華流麗

劉侍郎儼

公名儼字宣化吉水人正統己未狀元仕終太常寺卿卒贈侍郎謚文介按明初有劉儼字樗隱者

倪尚書謙

公名謙字克讓江寧人生有奇表體生四乳正統己未探花官編修至學士謫戍開平赦還與子岳同入史局仕終禮部尚書卒謚文僖著玉堂歸田諸集書法下缺

祝參政顯

公名顯字維清長洲人正統己未進士授刑科給事中累官至山西布政司參政歸田後與徐天全劉完菴杜東原輩耆碩燕集者二十年孫允明編次遺事傳世書法似永興廟堂碑體勢方棱結字頗大

韓襄毅雍

公名雍字永熙吳縣人正統壬戌進士累官右都御史總督兩廣卒贈襄毅

項宮保忠

公名忠字蓋臣嘉興人正統壬戌進士授刑部郎歷
官都御史兵部尚書卒贈襄毅有藏史居集

商太傅輅

公名輅字弘載涪安人正統乙丑進士第一累官少
保吏部尚書謹身殿大學士卒贈太傅謚文毅著素
菴集有明三百年制科中鄉會殿試皆掄元者惟公
一人而已

卞郎中榮

公名榮字華伯江陰人正統乙丑進士官戶部郎中
著蘭堂集

岳閣老正

公名正字季方灤縣人正統戊辰探花官編修天順

初以贊善入直內閣內批降欽州同知戍肅州久之復職侍經筵尋出知興化府卒謚文正長沙李少師其壻也刻類博稿行世書牘筆飛墨舞行狎可觀

夏布政寅

公名寅字正夫華亭人正統戊辰進士除吏部郎歷官山東布政使著史詠紀行集

倪御史敬

公名敬字汝敬無錫人正統戊辰進士官監察御史有月樓集

聶翰林大年

公名大年字壽卿臨川人用薦授仁和訓導升教諭景泰初徵入翰林修實錄卒著冷齋集公長身紫髯一目重瞳工唐律書法全似張伯雨而結體舒縱墨

氣亦古厚

周縣尉鼎

公名鼎字伯器嘉善人正統中沐陽伯金忠辟置幕府大征閩寇開濟奏功久之授沐陽尉休官後乘小舟遨遊三吳賣書畫自給碑板文章皆出其手年九十修杭州志猶簞鐙書蠅頭小楷著桐村土苴諸集

杜淵孝瓊

公名瓊字用嘉吳縣人博綜古今工詩文尤精繪理性至孝有司應詔屢薦屢辭不起晚徙家東原人稱東原先生好戴鹿皮冠自號鹿冠老人卒謚淵孝三吳會葬者數千人書牘小行楷筆法圓熟最精妙

張處士寅

公名寅字繼孟吳縣人詩文清麗尤長於南詞新聲

著夢養集書牘絕佳具有姿韻

沈處士 愚

公名愚字通理崑山人清修好學積書數千卷以詩名吳下景泰十才子也著貧籟吳歎集書工行草

沈處士 恆

公名恆字恆吉以字行長洲相城人石田先生父善繪事工詩與弟貞吉相酬和

柯少詹 潛

公名潛字孟時莆田人景泰辛未狀元官至少詹事翰林掌院學士玉堂後公手植二柏構瀛洲亭臨之劉文安呆齋濞井於其旁柯亭劉井詞林佳話也著竹巖集

楊侍郎守陳

大觀錄卷十

辛怡寄軒

公名守陳字維新鄞縣人景泰辛未進士由翰林仕至吏部侍郎兼詹事府丞卒贈禮部尚書謚文毅有晉菴桂芳鏡川鑒坡東觀等集

王威寧越

公名越字世昌濬縣人景泰辛未進士憲宗朝以兵部尚書出塞論功封威寧伯佩征西前將軍印鎮大同延綏坐交汪直奪爵孝廟時西塞急公年七十有二起總制寧夏經略哈密加少保卒於軍謚襄敏公廷試日旋風掣其卷颺空而去逾年高麗表進識者知爲萬里封侯之兆云著雲山老癩集

童尙書軒

公名軒字士昂番陽人景泰辛未進士歷升吏部尚書著枕肱集書法雖拘謹却有生趣

湯參戎胤勳

公名胤勳字公讓東甌襄武王曾孫周文襄以文武才薦召赴闕于少保就試蠡下奏授錦衣千戶通問裕陵於沙漠成化初充參將守禦延綏寇至力戰死之著東軒集

彭尚書華

公名華字彥實安福人景泰甲戌進士累官禮部尚書入直內閣加宮保致仕卒謚文思

丘閣老濬

公名濬字仲深瓊山人景泰甲戌進士歷官少保戶部尚書武英殿大學士卒謚文莊著瓊臺集

李冏卿應禎

公初名姓以字行更字貞伯長洲人景泰癸酉舉人

授中舍命寫佛經不奉詔升兵部郎中歷太僕少卿致仕卒之日貧無以殮文溫州史明古爲買地葬焉好古博學篆楷俱入能品

彭宮保 韶

公名韶字鳳儀莆田人天順丁丑進士除部曹以僉都御史出撫蘇松召爲大理卿轉刑部尚書卒贈太子少保謚惠安著從吾滯稿

李少師東陽

公名東陽字賓之茶陵人居京師四歲舉神童天順甲申成進士選入翰林累官太子太師吏部尚書華蓋殿大學士正德中致仕卒謚文正居館閣四十年獎進後學粲滿朝列顧操履潔清罷相後頗以詩文書篆資給朝夕著懷麓堂集南行東祀諸稿書學林

處士而行筆圓潤如珠手牘余所見幾百幅

謝侍郎鐸

公名鐸字鳴治台之太平人天順甲申進士歷官國子祭酒移疾歸復起爲禮部侍郎掌祭酒事卒贈禮部尚書謚文肅著桃谿淨稿

張修撰泰

公名泰字亨父太倉人天順甲申進士選庶吉士遷修撰卒著滄洲集書似鄧巴西紙光墨潤可愛

劉太保大夏

公名大夏字時雍華容人天順甲申進士選入翰林歷官右都御史總制兩廣拜兵部尚書劉瑾矯制繫獄戍甘州瑾誅復官卒贈太保謚忠宣著東山集

倪參政輔

公名輔字良弼平湖人天順甲申進士歷官湖廣參政有類劇藏稿

倪文毅 岳

公名岳字舜咨文僖子天順甲申進士選庶吉士累官吏部尚書卒謚文毅著青谿集書精妙似危太樸

姚御史 綬

公名綬字公綬嘉善人天順甲申進士拜監察御史謫知永寧解官歸作滄江虹月之舟泛遊吳越間粉窗翠幕彈絲吹竹家設亭館稱是作室曰丹丘自號雲東逸史著穀菴集書體似張伯雨而神趣迥別

馬主事 愈

公名愈字抑之嘉定人天順甲申進士爲刑部郎脫略不羈人呼馬清癡書體放誕不束繩墨別自成家

董尚書 越

公名越字尚矩寧都人成化五年探花入直經筵出使朝鮮多所撰述官至工部尚書卒謚文僖

程侍郎敏政

公名敏政字克勤休寧人襄毅公信子十歲以神童薦召試稱旨詔讀書翰林中成化丙戌榜眼歷官禮部侍郎掌詹事卒贈尚書著篋墩集書法全學聖教序得晉人三昧

韓尚書 文

公名文字貫道洪洞人成化丙戌進士累官太子太保戶部尚書贈太傅謚忠定著質菴稿

張太守 弼

公名弼字汝弼華亭人成化丙戌進士居兵曹最久

出知南安府律已愛物大得民和尋致仕著鶴城東海二稿草書怪偉跌宕震撼一世東海之名遂流布外國也

陳檢討獻章

公名獻章字公甫新會人成化中由鄉舉辟召至京授翰林檢討卒謚文恭著白沙集

林尚書瀚

公名瀚字亨大閩縣人成化丙戌進士歷官吏部尚書贈宮保謚文安著泉山集書似永興自成家數

文教諭洪

公名洪字功大長洲人成化乙酉舉人官涑水學教諭有括囊集

吳尚書寬

公名寬字原博長洲人成化壬辰會狀兩元累官禮部尚書掌詹事府事知制誥卒於位贈太子太保謚文定公經明行修頎然長德藏書多手抄書法全學坡公而瓠肥過之著匏菴集七十卷

楊少師一清

公名一清字應寧雲南人徙丹徒八歲以奇童薦入翰林成化壬辰登進士總制陝西諸邊入直內閣進少師吏部尚書華蓋殿大學士卒贈太保謚文襄著石淙類稿書得魯公三昧而瘦硬有骨力

文太守 林

公名林字宗儒長洲人成化壬辰進士歷官太僕寺丞告歸數年起知温州府卒於官公之溫時楊君謙餞之虎丘啓南爲之圖啓南韓克纘幅巾杖藜昌穀

子畏舉子巾服朱性甫韓壽椿青袍方巾而君謙與公紗帽相對圖文氏世藏前哲流風遺韻尤可想見云書法墨濃體肥似松雪盛年結構饒有古力

謝太傅遷

公名遷字于喬餘姚人成化乙未狀元累官禮部尚書武英殿大學士忤劉瑾罷歸世廟入繼召起爲戶部尚書謹身殿大學士尋致仕卒贈太傅謚文正著歸田集

王少傅鑒

公名鑒字濟之吳縣人成化乙未探花歷官戶部尚書武英殿大學士加少傅致仕永陵嗣立遣官存問將召用卒贈太傅謚文恪著震澤稿守谿集二十六卷

梁太師 儲

公名儲字叔厚順德人成化戊戌進士累官吏部尚書華蓋殿大學士卒贈太師謚文康著鬱洲集

趙觀察 寬

公名寬字栗夫吳江人成化辛丑進士由部郎歷提學副使遷廣東按察使著半江集書法得小蘇之體

邵尚書 寶

公名寶字國賢無錫人成化甲辰進士累官都御史總漕江北巡撫貴州卒謚文莊公受知李長沙以衣鉢門生期之如永叔之於子瞻云著容春堂集泉齋勿藥集

喬少保 宇

公名字宇希大樂平人成化甲辰進士累官吏部尚

書加少保卒謚莊簡武宗南幸公參贊留都有社稷
功世廟初以議禮去高臥不起歸然爲鉅公長德著
克蒙集

儲少宰 巖

公名巖字靜夫泰州人成化甲辰進士除歷吏部郎
官至僉都御史再起爲吏部侍郎卒謚文懿公博綜
古今其所述作皆托諸金石縑楮歿而柩木著黜墨
繪畫之異有嗣野集柴墟集

楊儀部循吉

公名循吉字君謙吳縣人成化甲辰進士除儀制司
主事好讀書在郎署每移病不出人呼顛主事年三
十一卽疏請致仕結廬支硎山以松枝爲籌課經史
著松籌堂稿卒年八十九

費閣老 宏

公名宏字子充鉛山人年十六領鄉薦十九登成化丁未狀元累官少師吏部尚書華蓋殿大學士卒於位贈太保謚文憲著鉛山集鵝湖摘稿

石少保 珪

公名珪字邦彥蘂城人成化丁未進士由翰林累官吏部尚書武英殿大學士加少保致仕卒初謚文隱更謚文介著恆陽集李長沙謂可託詩文之柄者

陸太宰 完

公名完字全卿長洲人成化丁未進士正德中以都御史討流賊於狼山殲焉拜兵部尚書改吏部論復宸濠護衛事戍鎮海卒於泉州著水村集

羅侍郎 玘

大觀錄卷十

王寄怡軒

公名玘字景鳴南城人成化丁未進士累官吏部侍郎在詞林多所匡救正德中忤時宰致仕宸濠卑辭致醜走避深山中病革聞南昌之變移書討賊投筆而絕贈尚書謚文肅著圭峯集

文僉都森

公名森字宗嚴長洲人成化丁未進士由縣令擢御史建言廷杖起太僕少卿終僉都御史巡撫江西喜聲詩語不在深自然蘊藉

朱處士存理

公名存理字性父長洲人少學制科謝去自少至老未嘗一日忘學聞人有異書訪求務得手自繕寫纂著鐵網珊瑚野航漫錄經子鉤玄吳郡獻徵錄名物寓言鶴岑隨筆數百卷

沈徵君 周

公名周字啓南長洲人祖父皆隱居相城工書畫景泰中郡守以賢良應詔筮得遯之九五乃決計隱遯所居曰有竹莊擅亭館花石之勝圖書彝鼎充牣其中興至對客揮毫煙雲滿紙畫成題署頃刻千言風流文采照映今古卒年八十三有石田先生集

史隱君 鑑

公名鑑字明古吳江人博洽好學執古信禮家居水竹幽茂亭館相通客至陳三代秦漢器物及唐宋書畫品鑒著古衣冠揮麈曳履望之者以爲列仙之儒著西邨集

黃郡博 雲

公名雲字應龍崑山人由歲貢任瑞州府學訓導食

貧力學文宗東坡書法山谷著丹巖集

金秀才 琮

公名琮字元玉金陵人自號赤松山農處已接物高
簡粹白倪青谿參贊留都擬薦於朝不果卒書法初
學趙文敏後宗張伯雨文待詔極喜之得其片紙裝
池成卷題曰積玉云

魏訓導 倂

公名倂字達卿鄞縣人官石城訓導歐陽鵬選其詩
曰雲松詩略

錢狀元 福

公名福字與謙華亭人弘治庚戌賜進士第一官翰
林修撰著鶴難集

毛尙書 澄

公名澄字憲清太倉人弘治癸丑進士第一人官至禮部尚書贈少保謚文簡

李提學夢陽

公名夢陽字獻吉扶溝人弘治癸丑進士爲郎時彈壽寧侯繫獄旋釋之劉瑾專恣公代韓尚書文草疏劾奏坐姦黨致仕起江西提學副使爲臺長計奏罷官著空同子集

王新建守仁

公名守仁字伯安餘姚人弘治己未進士爲郎時劾劉瑾謫龍場驛丞瑾誅召還擢卿寺以僉都御史巡撫南贛論禽宸濠功拜兵部尚書封新建伯卒謚文成有陽明先生集

都少卿穆

公名穆字元敬吳縣人弘治己未進士歷官禮部郎中乞休加太僕少卿致仕有南濠詩略相傳吳中有娶婦者大風雨滅燭無應衆皆曰南濠都少卿有讀書鐙在叩之果得火其勤學如此

周尙書 用

公名用字行之吳江人弘治壬戌進士歷官太子少保吏部尙書卒於位謚恭肅有白川集

陸詹事 深

公名深字子淵上海人弘治乙丑進士以祭酒充講官謫延平府同知歷方岳召爲光祿卿改太常兼學士升詹事府詹事卒贈禮部侍郎謚文裕博雅爲詞林之冠

徐博士禎卿

公名植卿字昌穀常熟人徙吳門弘治乙丑進士除大理寺寺副左遷國子博士著廷功五集弁山翁評公詩謂如白雲自流山泉泠然殘雪在地掩映新月書法標格清妍雅得山陰風致

姜太常立綱

公名立綱字廷憲號東谿永嘉人以善書官中舍歷太常寺少卿楷法端謹有儀範行書別具丰致

祝京兆允明

公名允明字希哲長洲人弘治壬子舉人除興寧知縣遷應天府通判自免歸卒年六十七有祝氏集略書學自急就以逮虞趙罔不得其結構若羲獻真行懷素狂草尤臻奧妙

唐解元寅

公名寅字伯虎一字子畏吳縣人弘治戊午舉鄉試
第一坐事論發爲吏監庶人厚幣聘公察其有異志
佯狂露穢得放歸築室桃花塢寄情詩酒玩世五十
四年而卒有六如居士集

張秀才靈

公名靈字夢晉吳縣人與唐子畏俱爲郡學生督學
方誌惡唐爲古文詞欲斥之公悒悒不自遣果連染
斥罷雅善圖畫工詩文嬰情酒德居狂簡之列

文待詔徵明

公初名璧以字行更字徵仲長洲人由歲貢薦授翰
林待詔謝病歸以清名長德主中吳風雅之盟者三
十年年九十方爲人書志石未竟欠仲閣筆端坐而
逝私謚貞憲先生

蔡孔目 羽

公名羽字九達吳縣人其學邃於易以太學生赴選
冢宰聞其名奏授翰林院孔目尋致仕歸持海內文
柄與吳文定王文恪齊名王履吉兄弟則親炙者也
著有林屋南館二集

陳山人 淳

公名淳字道復後以字行更字復父吳人家大姚村
天才秀發富而有文善畫得米元暉黃子久神韻工
古篆正行出入南宮北海閒而結體逾大愈見精能
聲價亦推重

王貢士 寵

公名寵字履吉吳縣人少與其兄都憲履約同學於
蔡九達讀書洞庭山及石湖者二十餘年循資貢入

太學著雅宜集卒時年僅四十後數十年名滿天下
履約併賴公以傳云

夏少師言

公名言字公謹貴谿人正德丁丑進士由行人累官
少師吏部尚書兼華蓋殿大學士嘉靖三十七年棄
市隆慶初復官賜諡文愍有桂洲集

唐都憲順之

公名順之字應德武進人嘉靖己丑會元部郎改編
修忤永嘉致仕久之起春坊尋奪職倭躡東南以職
郎視師浙中用胡宗憲薦超拜都御史巡撫淮揚卒
於軍謚襄文著荆川集